



特別
18
3414
2





門 八 18
號 3414
卷 2

御訂全金詩增補中州集卷一


金元好問原本

諸相上

張鄆王通古 一首 補

補金史張通古字樂之易州易縣人讀書
過目不忘該綜經史善屬文遼天慶二年

全金詩卷一



早稻田大學
25.6.22
藏

進士第補樞密院令史丁父憂起復懇辭
不獲因遁去屏居興平太祖定燕京割以
與宋宋人欲收人望召通古通古辭謝隱
居易州太寧山下宗望復燕京侍中劉彥
宗知其才名爲樞密院主奏改兵刑房承
旨天會四年初建尚書省除工部侍郎兼
六部事高慶裔設磨勘法仕宦者多奪官
通古亦免去遼王宗翰知其才遣人諭之

使自理通古不肯曰多士皆去而已何心
求用哉宗翰爲論理之除中京副留守充
詔諭江南使使宋歸除參知行臺尚書省
事天德初遷行臺左丞進拜平章政事封
譚王改封鄆王以疾求解機務不許拜司
徒封瀋王海陵御下嚴厲未嘗假詞色惟
見通古必以禮貌會磁州僧法寶欲去張
浩張暉留之不可得朝官又有欲留之者

海陵聞其事詔三品以上官責之曰聞卿等每到寺僧法寶正坐卿等皆坐其側朕甚不取佛者本一小國王子能輕舍富貴自苦修行由是成佛今人崇敬以希福利皆妄也况僧者往往不第秀才市井游食生計不足乃去爲僧校其貴賤未可與簿尉抗禮閭閻老婦迫於死期多歸信之卿等位爲宰輔乃復效此失大臣體張司徒

老成舊人三教該通足爲儀表何不師之乃召杖法寶於朝堂正隆二年以司徒致仕封曹王卒年六十九

靈壁寺

萬壑千巖裏林開一徑深數年勞想望此日快登臨勝境情難盡危塗力不任樓臺相映抱松柏自蕭森花散諸天雨燈傳古佛心鶴泉寒漱玉園地舊鋪金石磴崎嶇上桃谿窈窕尋淵明能止酒叔

夜况攜琴所恨無長暇徒勤惜寸陰清宵誰我伴
乘興但孤斟

劉曹王豫

七首

補二首

豫字彥由阜城人仕宋知濟南府事汴京
下立張邦昌爲大楚皇帝宋滅楚更立彥
由國號齊建元阜昌八年廢爲蜀王遷黃
龍府改封曹有集十卷行於世二子麟猊
孫通海陵朝參知政事四世孫瑛今在太
原

臣元鈞

謹按豫仕宋至郡守後入金繼邦

昌爲齊帝比於邦昌蓋殘烈焉前旣背宋
而終亦非金之幹臣反覆僭冒婦孺之所
不齒而好問錄金相首登其詩者以爲宋
臣齊帝豫皆不得而有之登之金廷其辜
自狀耳昔人謂中州一集寓史筆於採風
信哉

雜詩六首

竹塢人家瀕小溪數枝紅杏出疎籬門前山色帶

烟重幽鳥一聲春日遲

風荷柄柄弄清香輕薄沙禽落又翔紅日轉西漁
艇散一川山影莫天涼

古渡停驂日向沈淒涼歸思梗清吟碧山幾點塞
天濶紅葉一林秋意深

倚巖蕭寺據危崖丈室軒窓面水開雪霽莫寒山
月上數竿修竹一枝梅

晝色清明著色圖山光凝翠接平湖烟嵐自古人

難畫遠卽深深近却無

寒林烟重暝棲鴉遠寺疎鍾送落霞無限嶺雲遮
不斷數聲和月到山家

客館

雪消北嶺安排暖寒入東風阻節春絕塞亂山圍
古驛他時說著也愁人

題泗泉

泗泉奇且奧聲勢各喧虺虎豹巖邊去蛟龍窟裏
來混流烟作陣巧激雪成堆派必人疏導源應鬼
鑿開乍深濤不起滌繞浪相催可把江心比嘗將
海眼猜始微纔迸玉終盛若奔雷澗爲寒無卉丘
因潤有苔已觀離竇側俄見過城隈石勁崖難漱
沙虛岸易頽邇雖逾濟漂遐亦到蓬萊洗鉢僧常
至乘槎客未回我來源際瞰誰自谷中摧洶湧曾
浮磬潺湲好泛杯狹寧容蟻穴湍可暴魚腮擘華
非夫爾排淮乃力哉傍如巫女峽上類楚陽臺漏

澤空神異襄陵但水災林幽多鳥鵲地僻少塵埃
重愛茲佳趣題詩愧不才

蘇門一首


太行雄偉赤霄逼枝分蘇門爲肘腋孕奇產秀氣
蟠鬱湧作琉璃十頃碧初疑驪龍蟄山趾仰噴明
珠飛的礫忽如湘靈理新敕大盤開匣作磨拭峰
巒倒影浸雲烟蘋藻照沙改顏色相輝一段佳風
月餘潤幾州分動植昔聞隱淪仙人高標清與

溪山敞悠悠往事散浮雲嘯有遺臺行有跡我居
東秦濟水南無限泉池日親炙一行作吏別經年
情思塵埃何處滌靈祠因禱來憑欄頓爽骨毛決
胸臆飄飄蘭舟七八客樽俎笙簫隨分入勝槩續
紛眼不供恨乏魯戈揮晷刻歸城簿領厭沈迷春
睡每酣魂夢逼心約他時杖屨遊醉漱溪流枕溪
石

附中興紀事本末濟南府守臣劉豫者阜

城人中元符第嘗爲臺官因論禮制局事
道君上曰劉豫河北村叟不識禮制遂黜
於外至是纔復爲郡時金師來攻豫遣其
子麟部兵出戰爲金所圍豫檄通判張東
援之金解去粘罕乃遣人啗豫以利豫卽
詣軍前通款

附中興紀事本末豫初僭位作楮幣自一
貫至百貫皆識其末曰過八年不在行用



杜丞相充

一首

充字公美相州人仕宋知滄州歸國拜尚
書右丞相領中山行臺以壽終

塵

汨汨勞生爲爾忙只除不到白雲鄉步回洛浦生
羅襪歌斷秦樓菽杏梁閒撲衣襟迷遠望靜穿窻
隙鎖斜陽帝城別有風流在輦路春風十里香

附

大金國志宗盤之難撻懶預謀時方握

全金言卷一
兵在外難以遽誅仍除撻懶爲燕京行臺
左丞相又僉書杜充爲右丞相命下撻懶
語使者曰我開國功臣何罪而與降奴杜
充爲伍耶不受命而叛

附中興紀事本末初金以余覲之叛收平
州守郭樂師相州守杜充平陽總管蕭慶
皆下元帥府獄旣而悉免之惟雲中副留
守李處能預謀族誅左副元帥粘罕問杜

充爾欲南歸耶充曰他人敢歸南朝惟充
不敢歸也粘罕顧諸酋笑之時金主晟已
至中京欲遂之燕雲以余覲亂復還本土
至是副元帥而下知其主已回亦各歸所
部

虞令公仲文 一首

仲文字質夫世南之裔武州寧遠人仕為
遼相歸朝授樞密使平章政事封秦國公
四歲作詩賦煎餅有魚目蟬聲之句人以
神童目之

雪花 四歲作

瓊英與玉蘂片片落前池問著花來處東君也不
知

附圖繪寶鑑虞仲文畫人馬墨竹學文湖州

張丞相孝純 一首

孝純字永錫滕陽人宣和未知太原國兵
圍守踰年人相食幾盡乃下朝廷憐其忠
換相職後以相齊致仕汴京建行臺起爲
左丞相踰年得請歸鄉里二兄尚安健鄉
人爲作三老圖卒諡安簡子公藥字元石
昌武軍節度副使致仕孫觀字彥國世爲
文章家曾孫厚之字茂弘承安二年進士

中運使寄酒清明日到以詩謝之

芳樽到日恰清明似與嘉辰默計程擬助林園延
勝賞肯容桃李落繁英老來官爵渾無味閒裏杯
盤却有情見說使車臨岱麓儻能相過共飛觥

附中興紀事本末金人既割河南之地以
歸宋遂移行臺尚書省於大名府仍遣行
臺左丞相張孝純赴闕孝純自慙乃白右
副元帥兀朮願歸徐州致仕而卒

附林泉野記張孝純徐州人登元祐四年
第工詩有文武材略宣和末知太原府兼
河東路安撫使靖康初粘罕來攻先築夾
城於外期於必取百道進攻孝純與副總
管王稟以死守遙授檢校少保武當軍節
度使後河東諸郡相繼陷沒城破孝純不
得已遂降金金立劉豫於北京以孝純爲
左丞相紹興四年上密詔孝純與李鄴李

儔等令投身來歸當待之如初孝純竟不
至及金廢劉豫留孝純京師既而議和歸
我河南州縣又詔孝純赴闕孝純慚懼請
於金乞致仕歸徐州而卒

附金節要孝純守太原幾年而破執至粘
罕前逼令拜之孝純曰元帥乃金國大臣
某乃大宋國大臣豈有拜禮事至此惟有
死耳何相窘耶粘罕不能強之因囚歸雲

中此與哥舒翰潼關之敗屈節於祿山遠
矣孝純之得還也時正在雲中目覩其詳
是歲五月六日粘罕謂孝純曰公如此無
治生事秋當還公於鄉里又顧雲中留守
高慶裔曰如有人欠孝純錢物可督還之
且晚孝純歸鄉矣孝純初聞是語不知其
所以蓋時粘罕與劉豫之議密定外人莫
之知也至是粘罕遣人送孝純南歸止云

歸鄉而已故奉使宇文虛中送孝純詩有
開里共驚新素髮兒童重整舊斑衣之句
則衆莫知其相豫也明矣孝純旣至河朔
欲由濟南歸徐王者曰當與公共至東平
節制司某得回檄公方可歸徐矣旣行則
孝純之兄弟孝中孝立及諸姪鄉人竟遠
迓之孝純方喜慰之際無何至汶上豫已
僭位遽有拜相之命當是之時孝純昵於
親愛懼於還金因而以喪晚節於罪固莫
可逃然比之充豫之輩固有閒矣

張左相汝霖 一首

汝霖字仲澤遼陽人家世貴顯父浩字浩然以門資仕揚歷中外遂升端揆進拜太師封南陽郡王五子仲澤平章政事莘國公汝爲字仲宣河北東路轉運使汝翼仕不達皆進士也汝方字仲賢自號丹華老人汝猷字仲謀俱至宣徽使父子兄弟各有詩傳於世王子端內翰太師之外孫其

淵源有自云

春溪一首

黯黯春愁底處消小桃無語半含嬌東風不管前
溪水暖綠溶溶拍畫橋

附

畫史會要張汝霖善墨竹師黃華

劉右相長言一首

長言字宣叔東平人宋相莘老之孫而學
易先生斯立之猶子也父蹟年三十五終
於儀真令工詩能文有南榮集傳東州今
獨余家有之宣叔正隆宰相詩文能世其
家今不復見矣

通叔以詩送古鏡爲長言生日之壽次韻謝
之

綵衣祿隱非臞仙猶有向來文字緣都城一別兩
歲晚寄聲勞苦常相先人間始生俗禮重而我永
感方頽然遠憑詩句致奇物欲挽莫景迴虞淵規
摹九寸函大方古製不作菱花妍開奩拂拭愧陋
質但喜虹氣浮晴天夫君久要心不遷期與鐵杖
論清堅保身賴此孤月圓明年上印歸行田

附

元好問題學易先生劉斯立詩帖後學

易先生詩絕似東坡和陶不應入江西派

閒閒之論定矣此詩余初到崧山時曾見
之能得其意而不能記其辭搜訪二十年
北渡後將還太原過東郡乃復見之鄉人
王清卿家愛之深而不見之久煥若神明
頓還舊觀故喜爲之書余家唐劉長卿詩
學易堂舊物是先生手所授本題云壬午
六月就夏英公孫儀公家本校之字畫楚
楚如唐人書盤谷序又儀真令諱蹟者皇

全金詩卷一
統宰相宣叔之父是先生弟昆行有詩文
二冊號南榮集宣叔錄之以備遺忘亂後
惟余家有之然則余於學易劉氏豈世之
所謂緣熟者耶

右相耶律履 一首

履字履道東丹王之七世孫學通易太玄
至於陰陽曆數無不精究嘗以鄉賦一試
有司以露索爲耻遂不就舉蔭補國史掾
興陵朝累遷薊州刺史入翰林爲修撰歷
直學士待制禮部尚書特賜孟宗獻榜進
士第俄預淄王定冊功拜參知政事明昌
元年進右丞卒年六十一興陵嘗問宋名

全金言卷一
臣孰爲優履道以蘇端明軾對上曰吾聞
軾與王詵交甚款至作歌曲戲及姬侍非
禮之甚尚何足道耶履道進曰小說傳聞
未必可信就使有之戲笑之間亦何得深
責世徒知軾之詩文人不可及臣觀其論
天下事實經濟之良才求之古人陸贄而
下未見其比陛下無信小說傳聞而忽賢
臣之言明日錄軾奏議上之詔國子監刊

行自號忘言居士有集傳於世三子辨才
武廟署令善才工部尚書楚才中書令四
孫鈞鉉鏞鑄

補金史移刺履五歲時晚臥廡下見微雲
往來天際忽謂乳母曰此所謂臥看青天
行白雲耶兄德元奇之後章宗喜左氏傳
聞履博洽召質所疑履曰左氏多權詐駁
而不純尚書孟子皆聖賢純全之道願留

意焉

史院從事日感懷

不學知章乞鑑湖不隨老阮醉黃墟試從麟閣諸
賢問肯屑蘭臺小史無一戰得侯輸妄尉長身奉
粟媿侏儒禁城鐘定燈花落坐撫塵編惜壯圖

附元遺山集移刺履善契丹大小字譯經
辭達而理得大定初詔以小字譯唐史成
則別以女直字傳之履在選中獨主其事

更以女直字譯漢文選貴胄之秀異就學
焉

附畫史會要移刺履善畫蘭兼善畫鹿及
人馬

附金詩紀事案五代史契丹以其所居橫
帳地名爲姓曰世里世里譯者謂之耶律
又遼史本紀太祖姓耶律氏國語解云有
謂始興之地曰世里譯者以世里爲耶律

故國族皆以耶律爲姓又有言以漢字書者曰耶律以契丹字書者曰移刺明焦竑國史經籍志載有移刺楚材湛然集三十卷又耶律楚材集十二卷一列於金一列於元以一人爲二人甚失考據又金史國語解移刺漢姓曰劉

張平章萬公一首

萬公字良輔東阿人正隆二年進士仕長山令有惠政人爲立祠入爲右司員外郎太師淄王愛之許以宰相器明昌初累遷御史中丞以言事忤旨除彰國軍節度使名爲大興尹拜參知政事以母老丐歸養出判東平河中濟南丁內艱起復擢平章政事封壽國公爲相知大體有敦龐耆艾

全金詩卷一
三
之目既致政而眷顧未衰復起判濟南安
撫山東便宜行事未幾得請卒於家謚文
貞繪像衍慶宮配享章宗廟廷

補金史萬公父彌學夢至一室榜曰張萬
相公讀書堂已而萬公生因以名焉

戊戌二月中旬登稷山清榭

問囚推案朝還莫危坐不知春淺深今日檐間看
風色一株紅杏暗驚心

附元好問平章政事壽國張文貞公神道
碑故相壽國張公之孫好退謂某言先大
父之卒參知政事高公子約爲神道碑碑
石已具遭貞祐之事不克立好退南渡二
十年乃還鄉里思卒前事而高公之文於
時事有嫌不敢復議惟我先人以書生起
家仕宦至宰相身存踐履之實國有經綸
之業雖風流未遠而人代既遷徵良史則

全金言卷一
墜簡已亡懷舊俗則高年垂盡瞻言丘壠
旌紀寂寥好退無所似肖不能奉揚徽烈
負釁蒙累無以自處誠得吾子辱以第二
碑賜之則瞑目爲無憾矣敢百拜以請某
竊自念言不腆之文顧無足以紀公之美
且不能繼於高公之文之後固宜以不敏
辭所以不敢終辭者蓋金朝官制大臣有
上下四府之目自尚書令而下左右丞相

平章政事二人爲宰相尚書左右丞參知
政事二人爲執政官凡在此位者內屬外
戚與國人有戰伐之功預心腹之謀者爲
多潢霽之人以門閥見推者次之參用進
士則又次之其所謂進士者持以示公道
繫人望焉爾軒輊之權旣分疎密之情亦
異孤立之迹處乎危疑之間難入之言奪
於衆多之口以常情度之謂必以苟容爲

得計循默爲知體矣然而持區區之忠以盡心於所事如石右丞琚董右丞師中胥莘公鼎之流慨然以名臣自任者亦時有之惟公歷仕四朝再秉鈞軸不難於他人之所難不徇於世俗之所徇忠信篤實足以自結人主名德雅望足以師表百僚敦龐耆艾足以鎮國家而撫百姓故百年以來談良相者莫不以公爲稱首夫善化一

鄉智效一官人且喜聞而樂道之不欲使之隨世磨滅有如我公乃不得以著金石傳永久秉筆之士將不有任其責者乎謹按儀同三司平章政事壽國文貞公諱萬公字良輔姓張氏唐名臣公謹之後唐末有自東海徙汶上者後又徙東阿遂爲東阿人曾祖諱晞行善好施鄉人歸之宣政末常出財佐軍二子得補國子助教用公

全金言卷一
三
貴贈銀青榮祿大夫清河郡侯妣劉氏清
河郡太夫人祖諱詢孝弟力田家用不匱
贈金紫光祿大夫清河郡公妣崔氏清河
郡太夫人考諱彌學篤於學問以尚書爲
專門之業初應鄉試擢本經第一後罷經
義科以詞賦取士復預薦書已而嘆曰丈
夫寧老於童子彫蟲之技耶吾不復出矣
常銘其左右云欲求子孫先當積孝欲求

聰明先當積學世以爲名言累贈崇進壽
國公妣王氏壽國太夫人生四子公其第
四子也公幼穎悟號稱博聞強記弱冠登
正隆二年詞賦進士第釋褐穎順軍新鄭
縣主簿丁崇進公憂服除調沂州費縣主
簿正隆政衰盜賊羣起公有策禦之盜爲
衰止邑人賴焉大定四年調遼陽路辰淥
鹽司判官課最超淄川長山令去官之日

百姓爲之立祠十年充尚書省令史考滿
遷河北西路轉運司都勾判官歲餘改大
理司直十九年遷武寧軍節度副使二十
一年召爲尚書省右司都事朝廷知公殆
將大用矣未幾攝同知登聞檢院事奏對
稱旨乃真受焉再遷侍御史不數月改右
司員外郎郎中敷奏詳明不爲緣飾世宗
嘉賞之顧謂侍臣曰張萬公純直人也俄

遷刑部侍郎章宗卽位詔以遺留使於宋
使還會創設提刑司首命公爲河南路提
刑使不期年御史臺奏課爲九路之最擢
拜御史中丞時明昌元年也元妃李氏有
寵上欲立爲后臺諫以爲不可交攻之監
察御史宗端修右拾遺路鐸翰林修撰趙
秉文皆得罪去一日上遣中使密訪公吾
欲立后何所不可而臺諫乃不相容卿以

爲如何公言此大事明日當面奏及對因
爲上言國朝立后非貴種不預選擇元妃
本出太府監戶細微之極豈得母天下上
默不言明日出公爲彰德軍節度使兼應
州管內觀察使其後立后議寢上思公言
召爲大興府尹二年九月拜參知政事以
太夫人年過八十表乞就養不許未幾復
申前請乃授山東西路兵馬都總管兼判

東平府事以便親歲餘復以親老爲言乃
聽歸侍六年起爲河中府尹時屬軍興調
度百出公爲之平物價寬民力比他州所
費省者什六七承安三年正月上以太夫
人之故移公濟南尹河中之人爲建去思
堂畫像事之九月丁內艱卒哭詔以明年
正月朝京師起復授平章政事超資善大
夫封壽國公主兵者言比歲征伐多至敗

芻凡以軍事所給之地不足自贍至有不
充饑寒者所以無鬪志願括民田之冒稅
者分給之則戰自信矣朝臣議已定公獨
上章極諫其不可者五大畧以爲軍旅之
後瘡痍未復百姓撫摩之不暇何可重擾
一也通檢未久田有定籍括之必不能盡
適足以增猾吏之敝長告訐之風二也浮
費侈用不可勝計推之以養軍可歛不及

民而足無待於奪民之田三也兵士失於
選擇強弱不別而使之同田而共養振厲
者無以盡其力而疲劣者得以容其姦四
也奪民而與軍得軍心而失天下心其禍
有不勝言者五也必不得已乞以冒地之
已括者召民蒔之以所入贍軍則軍有坐
獲之利而民無被奪之怨矣不從卽以衰
病不任職乞罷賜告兩月且以尚醫調護

之泰和元年六月連章請老遷榮祿大夫
且以公第四子某四赴廷試當同進士出
身詔充閣門祇候又改筆硯局承應尋賜
進士第所以優禮公者他相莫與爲比二
年章再上有旨卿頻上章告老寧以言事
不見從或與同列者有差別故耶何求去
之數也公奏言臣誠衰老當避賢者路無
他意也三年正月章再上不允加銀青榮

祿大夫三月歷舉朝賢之可代已者求去
甚力上爲感動中使宣旨朕初卽位首命
卿入政府繼遷相位以卿習於典故處事
詳雅春秋雖高而神明未衰故且以機務
相勞今去意旣堅不得不屈朕以從卿耳
明日入辭詔以金紫光祿大夫致仕公退
居上所以待之者不少衰朝廷有大利害
則遣使者就訪之六年南鄙用兵上以山

東重地須大臣鎮撫之手詔起公判濟南府山東山西路宣撫使便宜行事公爲之布教條問民所疾苦貸逋賦以寬流亡假閒田以業單貧戍邊郡者戒之以守疆場毋敢妄動蒞州郡者戒之以省符牒毋敢妄擾經畫既定卽移文有司乞還鄉里上優詔許之仍崇進以榮其歸七年冬十月寢疾一日令具湯沐灑掃庭內曰吾將逝

矣命子益執筆書遺戒戒子孫以貴薄尚儉而已尋卒春秋七十有四上聞之震悼輟視朝賻贈加等祭葬皆用詔書從事有司攷行諡曰文貞仍贈開府儀同三司以八月二日舉公之柩葬於青太里北原之先塋壽國夫人劉氏祔焉大安元年詔繪公像於衍慶宮配享章宗廟庭公資朴直不自表襮自少日便能以沉默自養平居

不妄言笑事親孝待昆弟有禮與人交不苟合太夫人喜家居留官下者未嘗久每一書示至公必望拜庭下歛歛流涕而後發左右皆爲感動夫人前歿章宗欲有所賜再拜謝不敢當潔居終身兩童子自隨侍婢不得至其前閒居鄉縣與父老游敦布衣之好初不以名位自居仕宦五十年在州縣則治化清淨不事科罰而人有畏

愛之實在朝廷則切於論列有不便於民者必委曲道之雖理若訐直而辭氣容貌不失其爲大臣之體大定之治近古所未有紀綱法度備具周密公在相位謹奉行而重改作得守文之體故能不動聲氣而天下陰受其賜古所謂日計不足月計有餘者於茲見之故嘗論公平生所言者不勝載而繫於廢興存亡者有二事焉一立

后二括田立后難於從而章宗從之括田
不難從而竟不聽其後武夫悍卒倚國威
以爲重山東河朔上腴之田民有耕之數
世者亦以冒占奪之兵日益驕民日益困
養成癰疽計日而潰貞祐之亂盜賊滿野
向之倚國威以爲重者人視之以爲血讐
骨怨必報而後已一顧盼之頃皆狼狽於
鋒鏑之下雖赤子不能免蓋立后之事在

庭之臣皆以爲不可獨上以爲可故公之
言易爲力括田之事上下皆以爲可而公
獨以爲不可故難爲功以一言之不相入
其禍果有不可勝言者是不獨在公爲遺
恨異世相望亦當有太息而流涕者嗚呼
豈非天耶銘曰留侯授書三往雞鳴濟北
有期廼祠嘉平神物不亡時出效靈穀城
之張帝傳載生帝傳維何文貞壽公木訥

之剛朴魯之忠以靜而應以介而通悃幅
無華安事勇功郎署擢長憲臺進貳相業
之良興陵所試大定之治講若畫一公如
曹參守而勿失守而勿失民以寧謐賜則
陰受跡容致詰皇天生之曷不成之孝孫
受之曷不究之在昔所難在聽思聰烏羣
於前孰知雌雄兵以農戰國從本固皮之
不存毛將安傳一言之微邦可以興作法

於貪敝將曷勝悔罔後及忠無前寤我思
古人愛而莫助黃山之陽喬木蒼蒼公墓
有碑千載涕滂

御訂全金詩增補中州集卷二

金元好問原本

孫太師鐸 一首

鐸字振之恩州人大定十三年進士明昌
中擢戶部尚書時已有相望及考滿以戶
曹繁重且未有可代者特旨進一官再任

而同列二人俱以入相矣振之賀席中戲
舉青州老柏院布衣張在詩云南隣北里
牡丹開公子王孫去不回惟有廷前老柏
樹春風來似不曾來爲御史所劾降授同
知河南府事有以詩送之者云想到洛陽
春正好南隣北里牡丹開聞者皆大笑振
之後入政府遷尚書右丞卒贈太子太師
作詩甚多其賦玉簪有披拂秋風如有待

裴回涼月更多情之句甚爲詩家所稱

癸亥清明日

翛然一室暗塵凝兀兀端如打坐僧習氣未除私
自笑短檠還對讀書燈

董右丞師中 一首

師中字紹祖邯鄲人後徙洛州皇統九年
進士承安中入政府直道自立而以通材
濟之泰和初元妃李氏方寵幸兄喜兒爲
宣徽使有楊國忠之權一日德州教授田
庭方上書言事云大臣持祿近臣怙寵此
言路之所以塞也道陵顧謂紹祖言大臣
持祿當謂公等近臣怙寵者爲誰時喜兒

侍立殿上紹祖倒笏指之曰莫非謂李喜
兒之屬否上頷之紹祖嘗言作宰相不難
但一心正兩眼明足矣少日以詼諧得名
及在相位亦未嘗廢談笑然不害其爲國
朝名相也俄致政賜第京師後三年卒有
燕賜邊部詩傳於世紹祖師王內翰彥潛
而與之同榜登科彥潛沒後待其子恩禮
殷重不減骨肉論者謂孫鐸振之事其兄

明之張穀伯英愛其弟伯玉舉世無與爲
比至於紹祖之待其師之子則古所未有
也有漳州集傳於家

補金史師中乞致仕詔賜宅一區留居京
師以寒食乞過家上塚許之且命賦寒食
過家上塚詩

自臨洮還

臨潭仍是漢家城

漢家城在臨潭羌人所稱

積石相望十驛程

西畧河源東並海此身何地不經行

紹祖之孫濟剛記此詩末

句又作塵埃
風雨歎勞生

梁參政瑄

一首

瑄字國寶別字瑩中范陽人大定十六年
進士歷州縣稍遷警巡使治尚嚴肅權貴
歛迹朝廷知其才累試繁劇由中都路轉
運使拜戶部尚書俄參知政事資方正敢
言大事北兵動立和議人有笑其懦者卒
如其言未幾卒於位虎賁咤曰梁瑄在族
矣其爲人可知

留題長平驛

秦趙均為失霸圖起何殘忍括何愚殺降未見無
禍者累將其能有種乎日莫悲風噎丹水夜深寒
月照頭顱

山名也

快心千載杜郵劍人所誅耶鬼所

誅

賈左丞益謙 一首

益謙字亨甫本名守謙避哀宗諱改焉宣
宗朝參知政事出知濟南移鎮河中南渡
後召拜左丞尋致仕居鄭州哀宗即位史
官乞因宣廟實錄遂及衛紹王初虎賊既
行逆乃立宣宗宣宗之人至謂衛王失道
天命絕之虎實無罪且於主上有推戴之
功獨張信甫上章言虎賊大逆不道當用

宋文帝誅傅亮徐羨之故事章奏不報爾
後舉朝以大安崇慶之事爲諱及是謂亨
甫大安中嘗拜御史中丞宜知衛王事乃
差編脩官一人就訪之亨甫知其旨謂來
者言知衛王莫如我然我聞海陵被逆而
世宗皇帝立大定三十年禁近能暴海陵
蟄惡者得美仕史官脩實錄誣其淫毒狠
鷙遺臭無窮自今觀之百可一信耶衛王

勤儉慎惜名器較其行事中材不能及者
多矣吾知此而已設欲飾吾言以實吾罪
吾亦何惜餘年朝議偉之正大三年年八
十卒子賢卿頤卿翔卿皆以門資仕今一
孫仲明在東平

補歸潛志守謙字彥亨東平人擢第蒞官
以能稱章宗時爲諫議大夫皇叔鎬王以
疑忌下獄公力爭士論直之大安末拜參

金鑑詩卷二
知政事南渡進右丞遷左丞致仕卒

贈答史院從事

見說才明自妙年多慙政府舊妨賢物華天寶無
今古鳳閣鸞臺孰後先鄭圃道尊何敢望濟南書
在子當傳莫言老眼昏花滿及見風鵬上九天

丞相壽國公高汝礪 一首

汝礪字巖甫應州金城人大定中進士揚
歷中外居戶曹三司爲最久相宣宗十年
小心畏慎夙夜匪懈篤於古人造膝詭辭
之義謀謨周密人莫得而聞元光末宣宗
上仙公亦卒於位君臣之契義均同體者
於斯見之平生嗜讀書南渡之後機務倥
惚未嘗一日廢書不觀臨終留詩有寄謝

東門千樹柳安排青眼送行人之句時年
七十一諡□配享宣宗廟庭至今士論謂
公才量渾厚足爲守成之良相恨所遭不
時耳

補歸潛志汝礪字巖甫應州人擢第入仕
有能名嘗爲左司郎中諫議大夫入戶部
專掌財賦遷尚書改三司副使倡行鈔法
以代貨泉宣宗南渡拜參知政事遷左右

丞進平章政事右丞相封壽國公正大初
卒於位年七十餘爲人慎密廉潔能結人
主知守格法循默避事不肯彊諫故爲相
十餘年未嘗有譴訶壽考康寧當世莫及
金國以來書生當國者惟公一人耳

補歸潛志巖夫在相位元光二年元日慶
七十會鄉里交舊且求作詩文時先子以
新罷御史避嫌不赴余方弱冠爲作詩以

全金言卷二
九
公頗負謗且勸其退休也公得詩大喜趣
召余迎謂余曰解道青雲自致不須階邪
又撫余背曰汝費字如何下來蓋余詩云
青雲自致不須階十稔從容位上台負荷
一堂森柱石調和衆口費鹽梅勤勞密邇
三朝重壽考康寧七秩開家道益昌孫有
息綵衣扶杖好歸來雷希顏爲作序亦有
乘天眷未衰可以引去之語後余將歸淮
陽復獻書勸其舉一人自代可得致政歸
然公竟卒相位不能從也

補金史高汝勵爲左司郎中一日奏事紫
宸殿時侍臣皆迴避上所御涼扇墮案下
汝勵以非職不敢取以進奏事畢出上謂
宰臣曰高汝勵不進扇可謂知體矣

補金史世宗謂人才堪任事而處心不正
者終不足貴汝勵對曰其心不正而以才

濟之所謂虎而翼者也雖古聖人亦未易知上以爲然他日復謂宰執曰凡人處心善良而行事忠實斯爲難得若言巧心僞亦復何用然善良者人又多謂之平常汝勵對曰人材少全亦隨其所長取之耳上以爲然

雨後

時雨雨三日田家家萬金有年天子慶憂國老臣

心

胥鼎 一首

鼎字和之代州繁峙人父持國大定中爲
 太子司藏有功母后家章宗卽位擢拜尚
 書右丞和之大定二十八年進士至寧初
 都城受兵由戶部尚書參知政事宜宗卽
 位除泰定軍節度使不赴改判大興貞祐
 二年拜尚書右丞車駕南渡出爲汾陽軍
 節度使移知平陽權河東南路宣撫使四

年授樞密副使權右丞兼職如故五年正月朝京師進平章政事封莘國公行臺關中未幾兼左副元帥明年以溫國公致政封英行臺衛州以病卒於位雷希顏爲作神道碑云黃霸爲良吏稱首及爲丞相與張敞論列功名大減王允當漢祀之衰計誅董卓近古社稷臣然不赦涼州人旋致催汜之禍蕭俛之清介崔植之論議皆足

爲唐名臣而俛議銷兵植餓朱克融輩不畀一官遂再亂河朔彼或量不足或才畧有所窮權不足以濟事知不足以知時故也以姚崇之賢惟其不知道未免爲救時之相其他可知也國家有通明相曰英國胥公尚兼數公之長予謂希顏此論似涉過差至於爲國朝名相以度量雄天下則在公爲無媿矣在長安日乞致仕表云興

造功業方聖主有爲之時表裏山河豈愚
臣養病之地送弟有之云世事正須高著
眼宦途休厭少低頭他文類此弟恒常之
子嗣祖今在燕中

補歸潛志鼎字和之繁時人父持國章宗
時執政公少擢第以能稱爲右司郎中善
占對大安末爲參知政事俄出鎮平陽宣
宗南渡行臺河中兵民安輯進平章政事

兼左副元帥移鎮京兆封莘國公後朝廷
將伐宋取蜀召議公歸上言止之坐是忤
旨致仕公通達吏事有度量爲政鎮靜所
在無賢不肖皆得其歡心南渡以來書生
有方面之柄者惟公一人而已

送弟恒作州

男子四方志人生五馬榮君恩何以報民政不宜
輕御物當存恕存心要盡誠勿矜新號令姑守舊

章程歛暴單貧困囚淹狡僞萌慈柔難禁暴苛急
必傷生東郡吾將老西陲敵未平一生能幾別四
事果難并方此對牀樂愴然分袂驚荒詩何足記
聊寫弟兄情

張左丞行中 一首

行中字信甫莒州日照人祖莘鎮西軍節
度副使父暉御史大夫以武安軍節度致
仕兄行簡易無體榜第一人信甫大定二
十八年進士衛紹王朝虎賊已除名爲民
賂遺權貴得復用信甫言其必反及弒逆
自爲太師尚書令澤王信甫時爲禮部尚
書人謂必爲所殺甚危之一日虎下禮部

鑄監國寶信甫持不可虎雖怒然亦竟不能殺也宣宗卽位授參知政事丞相高琪專權用事聲勢焰焰人莫敢仰視議論之際唯信甫與之抗朝廷稱焉所居拙軒有爲作銘者其引云發凶豎未形之謀則先識者以爲明犯強臣不測之威則疾惡者以爲剛蓋實錄云元光末出爲靜難軍節度使哀宗卽位首命召之遷尚書左丞後

二年致政卒於崧山之崇福宮信甫家世儒素雖位宰相而奉養如寒士日書經史五百字爲課寒暑不廢者四五十年故於書無所不讀詩殊有古意也

補歸潛志行信字信甫先名行忠避末帝舊諱改莒州人御史大夫曄之子太子太傅行簡之弟也家世以純厚稱士論以爲如漢萬石君家公少擢第歷清要宣宗南

渡爲禮部尚書時丞相木虎高琪擅權百
官側目因廷議事公獨抗言折之上甚喜
明日拜參知政事未幾爲近侍所譖出鎮
涇州到官上疏論近侍之奸士大夫稱之
正大初首召拜丞相言事稍不及前人望
頗減後致仕數年卒爲人簡朴不修威儀
惡衣糲食如貧士旣致仕家居惟以鈔書
教子孫爲事葺園池東城號靜隱亭時時

游詠其間爲樂南渡宰執中最有直名初
至南京父曄以御史大夫致仕猶康健兄
行簡爲翰林學士承旨公爲禮部尚書諸
子姪多中第居官當世未之有也

右丞文獻公所畫張果像

古來人物畫爲難驚見仙公樹石間莫把丹青名
右相太平勲業在人寰

楊戶部慥 二首

慥字叔玉代州五臺人承安五年進士歷
州縣入爲尚書省令史拜監察御史侍御
史西京大農司丞京南司農卿戶部侍郎
權尚書自入戶曹卽有相望資雅重事無
鉅細處之皆有法至於知朝廷大體則又
非他人所能及也京城受兵權參知政事
明年卒於河平叔玉文工於詩而人不以

能文稱特未見其文耳

補歸潛志慥字叔玉五臺人擢進士第南渡爲監察御史戶部郎中司農卿遷戶部侍郎通吏事有能名正大末權參知政事後罷守戶部南京降病卒嘗與余先子同任御史頗作詩

附歸潛志大臣尤當以至公至正黜陟百官不可畏嫌避黨爲自保計南渡爲宰執

者多怯懼畏懦不敢有爲凡處一事先恐人疑已如宰執本進士或士大夫得罪知其無辜不敢辨言恐人疑其爲黨也又或轉加詰責以示無私或要職美官寧有他流取媚於衆一登省府遽忘本來用心如此望其成功名立節義難矣然亦往往不能以富貴自終向使以公正自持未必以是得罪也人云用智巧者竟何如哉宰相

之職佐人主治天下所患耳目不廣不能
周知民間苦樂國勢安危故當忘私去智
取諸人以爲善以天下治天下至於百官
士流賢否皆當如家人美惡一一辨其才
然後進退用舍合公望辨職業而爲國者
立法使百官賓客不得謁見於私第何哉
其意正以防其請托而私徇也夫果察其
人私徇不公豈可使爲宰相哉旣已爲宰

相是已以天下副之矣誠不宜猶爾防閑
也唐裴晉公一日拜相遽請於私第見百
官賓客可謂遠謀而憲宗信之卒平淮蔡
此其君臣遇合故有此奇偉士成功名使
齷齪者爲之亦不敢請而庸主亦不聽也
余觀南渡後爲宰執者自非親戚故舊往
往不得登其門若夫百官士流未嘗接議
論局局自得惟恐失之如此望其所用得

人聞見不塞者未之有也

過司竹監有懷王監正之

不見崧丘跨鶴仙才名留得萬人傳
春郊漬酒傷今日夜雨論文記昔年
宰樹謾懸公子劍高山已絕伯牙絃
故居修竹青青在寂寞終南落照邊

乾陵

牝雞一啄血波流天下何緣不姓周
今日阿婆心力盡乾陵秃似老僧頭

御訂全金詩增補中州集卷三

金元好問原本

狀元

鄭內翰子聃 一首

子聃字景純大定人少日有賦聲時輩莫
與爲敵天德三年第三人登科士論仍以

為屈而海陵不之許也正隆二年詔景純

再試擇能賦者八人先以題副之以困景

純且將視其中與否罪賞之

御題天賜勇智正萬邦海

陵謂侍臣漢高祖諱不避之可乎乃改作萬國

及開卷景純果第

一人楊伯仁張汝霖中選劉幾綦戩李師

顏輩皆被黜海陵終不以景純為工與被

黜者兩罷之趙獻之賀啓云丹桂一枝不

失舊物青錢萬選無媿古人其為名流所

稱道如此累官吏部侍郎改侍講學士卒

其賦醱醲有玉斧無人解修月珠裙有意

欲留仙之句甚為詩家所稱

卽事

一錢不直程衛尉五斗解醒劉伯倫讀罷離騷解

衣臥門前花柳自爭春

孟內翰宗獻 六首

宗獻字友之開封人大定三年鄉府省御
 四試皆第一供奉翰林曹王府文學兼記
 室參軍以疾尋醫久之授同知單州軍州
 事丁母憂哀毀致卒劉無黨題其詩卷後
 云簪紱忘情累山林閱歲陰選官堂印手
 說法老婆心 友之深於內典 世路嗟前却人生變
 古今公乎真不死名姓斗之南相人孔嗣

訓挽云二十年間事才名一夢新衰羸驚

喪母哀毀竟亡身魂返愁楓夜情留淚草

春黃公酒壚在此去只悲辛汴人高公振

特夫云見說平生夢前途盡目前友之未第時夢

中預見前途所至於今皆驗 乘除雖有數凶禍竟何緣

禮樂三千字才名二十年仁人遽如許無

路問蒼天又云誰謂詩成識清水果自焚

友之雪燭詩固知劫火終無盡誰謂清冰也自焚未幾下世 人嗟埋玉

樹天為落文星友之隣舍李生言六月中連二明星隕於友之所居

虛靜軒前 數詩雖不盡工姑并記之有以見先

生於出處之際死生之變造物者皆使之

前知其以天下重名畀之者為不偶然云

補歸潛志金以律賦著名者曰孟宗獻友

之趙樞子克其主文有藻鑒多得人者曰

張景仁御史鄭子時侍讀故一時為之語

曰主司非張鄭秀才非趙孟律賦至今學

者法之然其源出於我高祖南山翁故老
云孟晚進初不識翁因少年不第發憤闢
一室取翁賦剪其八韻類之帖壁間坐臥
諷味深思已而盡得其法下筆造微妙再
試魁於鄉於府於省於御前天下號孟四
元迄今學者以吾祖孟師也孟雖仕不甚
貴作詩詞有可稱自號虛靜居士頗恬淡
留意養生術嘗著金丹賦行於世其詩詞

亦有集

補金史故事狀元官從七品階承務郎世
宗以宗獻四試第一獨異等與從六品階
授奉直大夫

龔平甫森玉軒

古人借宅亦種竹大是饕奇心未足高齋聞有萬
琅玕坐對懷山飲秋綠官閒勝日無一事尊酒不
空仍有肉他時剝啄叩君門高枕矮牀容我宿

舊蓄一琴棄置者久矣李君仲通爲張絃料
理仍鼓數曲以詩贈之

我家箏奴憂樂同塵埃滿面鬢髮蓬徽絃不具挂
牆壁似慙無以娛衰翁夫君一見爲披拂坐使寒
谷回春融中含太古意味足雜以新態來無窮繁
聲流水不可喻直與造化相冥通形神久已坐灰
槁一旦抉剔驅盲聾寂然反聽杳難詰但覺萬竅
俱玲瓏千金不得和扁力誰謂起廢由枯桐曲終

玄旨竟誰會非絃非指仍非空拂衣欲往君且止
爲我乘興彈悲風

張仲山枝巢

達人孤高與世疎百年直寄猶須臾歸來掩關聊
自如人之不足等有餘樂哉下視濠梁魚逍遙自
契蒙莊書異時馭氣游太虛我知枝巢亦蘧廬

柳塘

搖搖風影漾寒塘靜裏亭臺日月長不似隋家堤

岸上亂鴉殘照管興亡

蘇門花塢

繞舍雲山慰眼新看花差後洛陽塵從君小築繁
香塢不負長腰玉粒春

閏月九日

南崖烘暖貯秋光勝處相泔醕一觴俚諺難逢兩
寒食閏餘今值小重陽頭風比似常年愈菊面渾
如去歲黃老矣歡遊定能幾佳時此樂最難忘

趙內翰攄

一首

攄字子充宛平人自號醉全老人

早赴北宮

蒼龍雙闕鬱層雲湖水鱗鱗柳色新絕似江行看
清曉不知身是趁朝人

趙文學承元

一首

承元字善長先世汴人兵火間寓旅河間
遂占籍焉大定十三年詞賦第一人除應
奉翰林學士兼曹王府文學以疎俊少檢
得罪王府貶廢久之遇赦量叙卒於臨洮

探春

冰底流泉匹練飛麴塵著柳不禁吹杖藜恰到春
生處已有人家插酒旗

張太保行簡 三首

行簡字敬甫大定十九年詞賦第一人家
世儒臣備於禮文之學典貢舉三十年門
生徧天下南渡後遷禮部尚書太子太保
翰林學士承旨卒諡文正楊內翰之美銘
其墓稱敬甫天性孝友太夫人疾不解衣
者數月居喪哀毀過禮事其父御史大夫
自幼至終未嘗少違顏色與諸弟居三十

全金言卷三
九
餘年家門肅睦人無間言率勵子弟不知
爲驕侈雖處富貴與素士無異平生無汎
交無私謁慎勤周密動循禮法居無怠容
口無俚言身無徑行雖古君子無以加故
天下言家法者唯張氏爲第一言禮樂言
文章言德行之純備者亦唯張氏之歸有
集三十卷傳於家敬甫賦燕云王氏烏衣
巷盧家白玉堂寒食云餉粥雞毬留故事

風花鶯柳鬧春城中秋云露凝灑氣霑瑤
席雲近清光護桂宮此類甚多也

補金史司天臺劉道用改進新曆詔學士
院更定曆名行簡奏乞覆校測驗俟將來
月食無差然後賜名詔翰林侍講學士党
懷英等覆校懷英等校定道用曆明昌三
年不置閏卽以閏月爲三月二年十二月
十四日金木星俱在危十三度道用曆在

十三日差一日二年四月十六日夜月食
刻不同道用不曾考驗古今所記此證事
迹輒以上進不可用當徒長行彭徽等四
人各罷去久之改官禮部侍郎提點司天
臺直學士羣臣請上尊號上不許詔行簡
作批答因問行簡范祖禹作唐鑑論尊號
事行簡對曰司馬光亦嘗諫尊號不若祖
禹之詞深至以謂臣子生諡君父頗似慘

切上曰卿用祖禹意答之仍曰太祖雖有
尊號太宗未嘗受也行簡乞不拘對偶引
祖禹以微見其意其文深雅得代言之體
所著文集十五卷禮例纂一百二十卷會
同朝獻禘祫喪葬皆有記錄及清臺皇華
戒嚴爲善自公等記藏於家

六月二十九日北宮朝回

疎柳衰荷又一時清波飛葉夢靈芝年年踏盡溪

邊路不覺吳霜點鬢絲

酬郭光秀才

疇昔君來事已睽豈知今我又羈棲波臣儻不辭
升斗鵠卵終當遇魯雞

題子端雪谿小隱圖

出處皆天豈自由仙標終合冠鰲頭不妨貌取黃
華景時向鈴齋作臥游

附趙秉文張文正公碑貞祐三年冬十二

月十六日翰林學士承旨張公以疾終於
正寢訃聞上爲輟朝命勅祭勅葬贈銀紫
光祿大夫諡曰文正前代諡文正者不過
三數人本朝惟唐括丞相與公二人而已
嗚呼亦可謂榮矣初明昌泰和間明天子
勵精政事修飾治具典章文物高出近古
公之父清獻公任奉常春官朝廷典憲皆
其討定修國朝儀禮完然爲一代法其後

公繼之前後垂三十年凡朝廷有大制度大典冊大號令至於紀世宗顯宗章宗三朝之宏休偉烈未嘗不經公之手初宋人寇邊南鄙用兵書詔旁午公獨任其責沛然有餘朝廷以平章政事僕散揆軍回石副元帥完顏匡等圍襄陽又賊帥丘審遣人告和或議乞以恩旨許將士回俘掠公言君人者與爲將帥不同君道以仁義爲

主弔民伐罪而已將在閫外權其事宐可也藉如軍士應須俘掠與出之自上不若出於帥臣之爲愈也其論襄陽可攻圍與否及欲分淮南之半爲界公言向者大舉本朝平蕩江漢今平章軍回竊意在彼事勢或有未得如吾意者但隨所得郡縣撫而有之彼必以我圖久駐之計方事進取震懾畏亡求成不暇矣不必以淮南遠近

爲斷其後張宥書來以朝廷所須五事但
欲量增歲幣歸泗州俘畧朝議以面奉聖
旨必以割地稱臣使得贖罪爲辭公又言
有司之事容可擬議至於聖訓理難中止
大定初蓋度宋必能遵稟故令帥府開示
聖訓報諭今旣聖度包荒竊恐宋人以要
約重難急於求請不若使其易從然後示
之聖訓重以生靈之故曲依來請庶幾兵

革早息其後以叔易伯重增歲幣函賊臣
之首獻犒軍之賞公在翰苑籌畫爲多南
邊底定固賴明天子與大臣協謀蓋亦有
內相之助焉初清獻公由禮部郎中出守
林棣代爲郎中及以尚書遷亞相公復爲
侍郎及清獻公致政之後公又有御史之
拜衣冠傳爲榮事故其誥命有鄭之桓公
代爲周司徒韋之賢成繼作漢丞相之語

公之沒朝廷以公家傳禮學復命其弟行
信爲禮部尚書自非學問該博議論篤正
而濟之以深醇之行勤敏之操何以有此
公諱行簡字敬甫莒州日照人祖萃卿以
醇儒碩學顯名當世仕至鎮西軍節度副
使父曄經明行修嘗任御史大夫公大定
十九年擢詞賦進士第一時年二十四公
性純厚端懿謹慎周密口無擇言而爲善

不近名修道不求容惟以公勤忠直自結
人主之知是以歷仕累朝俱蒙寵遇平生
少交遊寡言笑嘗以謙敬自持待人以誠
而與物無忤故卒之日朝士大夫哭之哀
焉曰世不復有斯人也其家風醇謹似萬
石君通達典故似虞祕書經學論議似陸
宣公詔誥典冊似李贊皇人得其一已獨
厭餘不幾於全乎銘曰天地元醇降爲仁

人舍和醞真不溜不磷行爲世表文演帝
綸家傳禮學載筆終身敢有二事墜其清
芬歷仕四朝寵數益新何以致之惟敬與
勤緇衣美鄭德星聚陳顧後絕配瞻前無
隣惟清獻公如萬石君歲時問勞寢膳以
聞慶建白首朝服事親明星忽逝孤月獨
晨忠厚之氣歿爲明神公卒汴陽而葬南
原過者必式惟文正之墳

張內翰檝

四首

檝字巨濟先世泰州長春人有官於山陰
者遂占籍焉曾祖頤宗銀青榮祿大夫祖
惠懷遠大將軍父天白號縣簿巨濟明昌
五年詞賦第一人仕至鎮戎州刺史爲人
有蘊藉善談論文賦詩筆截然有律度時
人甚愛重之陝州詩云駭浪奔生馬荒山
臥病馳永寧劉氏園亭云菊老芙蓉衰梨

柿葉爭絳叩門人不應一犬吠深巷此類
甚多

秋興

飄零千里道牢落半生愁殘月如新月今秋似去
秋露濃花氣重風細竹聲幽何日清溪上煙蓑一
釣舟

客中

絳脣花不語青眼柳初眠塵去尋芳馬香來載酒

船歸期仍雁後野興已鷗邊惆悵無家客春風又
一年

蓮實

水妃擎出紺珠囊玉筍彫盤喜乍嘗膚白已攪新
藕嫩心青猶帶小荷香鬪餘翠鳥零珍羽飛盡黃
蜂露蜜房口腹累人良可笑此身便欲老江鄉

初夏

小園綠笋間朱櫻點綴年華似有情露浥葛巾晨

氣潤風隨竹簟晚涼生閒窺黠鼠潛身處靜厭飛
蚊遶鬢聲安得冷泉幽石畔解衣盤礴樹陰清

閻治中長言 八首

長言字子秀濟南長清人客居兗州之嶽
陽祖俊行臺南榜父時昇任忠傑榜曾高
以來登科者六世矣子秀少日慕張忠定
之爲人故名詠避衛紹王諱改焉幼孤養
於從祖能自振厲好學工詞賦間有前人
句法性本豪俊使酒任氣及游京師乃更
折節遂以謹厚見稱酒酣耳熱故態稍出

全金詩卷三
嘗以第一流自負屏山獨深知之不以爲
過也平生多奇夢果魁天下士論厭服在
翰苑十年出爲河南府治中被召以道梗
不得前卒於亳州子魯瞻魯安今一孫在

洛州

北齊行

天保大人襲世貴未待齊成已無魏讖裏方傳近
水羊夢中先兆攻城蝟六君三世都能幾二十八

年翻手裏細思孝靜靈運詩天道好還非妄矣

應制中秋

璧月當秋夜未闌漢宮高會浹宸歡塊蘇塵世三
千界珠翠瑤光十二欄桂實飄香浮壽筭露華零
潤溢仙盤都人側聽雲韶奏共指天家是廣寒

婆速道中書事

此地先經戰人生苦未聊泉源疏地脈田壠上山
腰敗石平危徑枯柴補短橋曉烟明遠爨莫雪暗

歸樵履滑心頻悸梯危骨欲消解鞍空倒卧無夢
訖通宵

送麗酒麗橙與秀實御史

驄馬朝回畫閣深遙知春意領梅心麗橙嬌軟麗
尊小聊助風流對淺斟

閣立本職貢圖

諤諤昌周此一書形容葵貢寫成圖寧知右相無
深意莫指丹青便厚誣

盤山招隱圖

畫出中盤望隱歸鳴珂朝馬尚遲遲賦詩未敢輕
相誚却恐吾山也勒移

三門集津圖

津門未爲天下險勿作駭相觀茲圖偃月堂中李
林甫有人能寫此心無

丁氏思祖亭

鶴野三千里鳧函五百年人間仍舊德龜筮得新

阡族屬東州望衣冠鼻祖傳異時誰式墓應識子孫賢

李治中著 一首

著字彥明真定人高才博學詩文得前人
體工於字畫頗尚立言承安二年經義第
一人在翰林七年出副定州召為戶部員
外郎坐大中黨事謫臨洮府判官量移西
京路按察司判官遷彰德府治中城再陷
避於塔上兵人招降大罵不從掘塔倒而
死

觀音院書閣

明巷蓬蒿一尺深小軒岑寂似山林鳥聲落枕有高下山色閱人無古今客裏三年侵老境牀頭一易浣塵襟晚涼癡坐忘言裏滿地西風白玉簪

附歸潛志金朝取士止以詞賦經文學士大夫往往局於此不能多讀書其格法最陋者詞賦狀元卽授應奉翰林文字不問其人才何如故多有不任其事者或顧問

不稱上意多出補外官章宗時王狀元澤民在翰林會宋使進枇杷子上索其詩澤民奏小臣不識枇杷子惟王庭筠詩成上喜之呂狀元造父子魁多士及在翰林上索重陽詩造素不學詩遑遽獻詩云佳節近重陽微臣喜欲狂上大笑旋令外補故當時有云澤民不識枇杷子呂造能吟喜欲狂

附金詩紀事案元好問續夷堅志呂內翰造字子成其大父延嗣父忠嗣俱第狀元子成未第時夢金龍蜿蜒自天而下攫而食之是歲經義魁南省詞賦繼擢殿元閣門請詩有狀頭家世傳三葉天下科名占兩元之句而歸潛志覆載其不能詩如此恐一時過爲嘲笑或失其實也

御訂全金詩增補中州集卷四

金元好問原本

宋耆舊

宇文太學虛中

五十首

虛中字叔通成都人宋黃門侍郎以奉使見留仕爲翰林學士承旨皇統初上京諸

全金詩卷四
一
虜俘謀奉叔通爲帥奪兵仗南奔事覺繫
詔獄諸貴先被叔通嘲笑積不平必欲殺
之乃鍛鍊所藏圖書爲反具叔通歎曰死
自吾分至於圖籍南來士大夫家例有之
喻如高待制士談圖書尤多於我家豈亦
反邪有司承風旨并寘士談極刑人至今
冤之

補歸潛志先翰林嘗談國初宇文太學叔

通主文盟時吳深州彥高視宇文爲後進
宇文止呼爲小吳因會飲酒間有一婦人
宋宗室子流落諸公感嘆皆作樂章一闕
宇文作念奴嬌有宗室家姬陳王幼女曾
嫁欽慈族干戈浩蕩事隨天地翻覆之語
次及彥高作人月圓云南朝千古傷心事
猶唱後庭花舊時王謝堂前燕子飛向誰
家偶然相見仙肌勝雪雲鬢堆鴉江州司

馬青衫淚濕同是天涯宇文覽之大驚自
是人乞詞輒曰當詣彥高也彥高詞集篇
數雖不多皆精微盡善雖多用前人詩句
其剪裁綴輯皆若天成真奇作也先人嘗
云詩不妄用前人語若夫樂章則剪裁古
人語亦無害但要能使用爾如彥高人月
圓半是古人句其思致含蓄甚遠不露圭
角不猶勝於宇文自作哉

鄭下趙光道與余有十五年家世之舊守官
代郡之崞縣聞余以使事羈留平城與諸公
相從皆一時英彥遂以應舉自免去駕短轅
下澤車驅一僮二驢扶病以來相聚凡旬日
而歸昔白樂天與元微之偶相遇於夷陵峽
口旣而作詩叙別雖憔悴哀傷感念存沒至
歎泣不能自己而終篇之意蓋亦自開慰况
吾輩今日可無片言以識一時之事邪因各

題數句而余爲之叙夜將半各有酒所語不

復鍛鍊要之皆肺腑中流出也

光道名晦時爲代州士曹

善篆隸詩筆高雅有集傳河東今不復見矣

窮愁詩滿篋孤憤氣填胸脫身枳棘下顧我雪窖

中竟日朋盍簪論文一樽同翻然南飛燕卻背北

歸鴻人生悲與樂倚伏如張弓莫言竟憤憤作書

怨天公

古劍行 爲劉善長作

公家祖皇提三尺素靈中斷開王迹自從武庫衝

屋飛化作文星照東壁夫君安得此龍泉秋水湛

湛浮青天夔魑奔喘禺強護中夜躍出光蜿蜒拄

頤櫺具男兒飾彈鋏長歌氣填臆嶙峋折檻霽天

威將軍拜伏姦臣泣龍泉爾莫矜雄鉞不見鳥盡

良弓藏會當鑄汝爲農器一劍不如書數行

白菊

西風蕭颯百草黃南齋白菊占秋芳主人好事不

專饗擷送客館分幽香幽香清豔兩難得冰雪肌
膚龍麝裊悄然坐我藥珠宮玉斧瑤姬皆舊識仙
家執菊名日精我今號爾爲月英月中風露秋夕
好感此仙種來曾城憑君傳與金天令月與霜姿
駐清景重陽好伴白衣來五柳先生憶三逕

還舍作

燕山歸來頭已白自笑容中仍作客此生悲歡不
可料況復吾年過半百故人驚我酒尚狂爲洗餅

疊貯春色酒闌人散月盈庭靜聽清渠流瀾瀾

庭下養三鴛鴦忽去不反戲爲作詩

先生久忘機爲爾虞繒繳一朝長羽翮萬里翔寥
廓誰信惡溝鴟忽作華表鶴豈無三玉環遺音嗣
黃雀

予寫金剛經與王正道正道與朱少章復以

詩來輒次二公韻

次正道韻

平生幸識繫珠衣窮走他鄉未得歸有客爲傳祇

樹法此心便息漢陰機百千三昧一門入四十九
年諸事非寄與香山老居士要憑二義發餘輝

又

次少章韻

前世曾爲粥飯僧此生隨處且騰騰經中因認人
我相教外都忘大小乘寫去欲云居士頌信來如
續祖師燈他年辱贈茅菴句誰謂因緣昔未曾

郊居

芒屨松冠野外衰茶鐺藥竈靜中忙含風荇逐波
紋展著雨花連土氣香停策仰簷朝覓句披襟穿
樹晚追涼蓬蒿似欲荒三逕疎嬾誰知意更長

歲寒堂

洞戶延清吹庭除貯綠陰不隨風月媚肯受雪霜
侵潤入珠泉爽聲傳玉帳深主人留勝賞同此歲
寒心

重陽旅中偶記二十年前二詩因而有作

舊日重陽厭旅衰而今身世更悲涼愁添白髮先

春雪淚著黃花助晚霜客館病餘紅日短家山信
斷碧雲長故人不恨村醪薄乘興能來共一觴

春日

北洹春事休嗟晚三月尚寒花信風遙憶東吳此
時節滿江鴨綠弄殘紅

己丑重陽在劍門梁山舖

兩年重九皆羈旅萬水千山厭遠遊白酒黃花聊
度日青萍綠綺共忘憂却憐風雨梁山路不似蓴

鱸楚澤秋何必東臯是三逕此身天地一虛舟

生日和甫同諸公載酒袖詩爲禮感佩之餘

以詩爲謝

詞人詩句壓離騷按膝長吟意自豪袖裏虹蜺衝
霽色筆端風雨駕雲濤將衰難稱千年祝增重虛
蒙隻字褒太史已應飛急奏文星偏傍使星高

和題稽古軒

堆架縑緗粲蔀居眼前長物埽無餘避囂官要鄰

人卜論友先尋上世書汲古不須憂綆短隨波聊
復任舟虛勿欺丈室纔容膝六合神游有日車

巳酉歲書懷

去國怱怱遂隔年公私無益兩茫然當時議論不
能固今日窮愁何足憐生死已從前世定是非留
與後人傳孤臣不爲沈湘恨悵望三韓別有天

涇王許以酒餉龍溪老人幾月不至以詩促

之龍溪叔通
別號也

先生寂寞草玄文正要侯芭作富鄰客至但須樽
有酒日高不怕甌生塵急催嶺外傳梅使來餉籬
邊采菊人已埽明窓供點筆爲君擬賦洞庭春

從人借琴

嶧陽慣聽鳳雛鳴瀉出冷然萬籟聲已厭笙簧非
雅曲幸從炊爨脫餘生昭文不鼓緣何意靖節無
絃且寄情乞與南冠囚繫客爲君一奏變春榮

過居庸關

奔峭從天折懸流赴壑清路回穿石細崖裂與藤
爭花已從南發人今又北行節旄都落盡奔走愧
平生

晚宿耀武關

山與煙雲暝溪兼冰雪流寒枝啼稭鞠煬室聚
呀此日征行困何時喪亂休尚矜爭席好無復舊
鳴騶

安定道中

落日塵埃壯陰風天地昏牛羊爭隘道烏雀聚空
村跛曳傷行役光華誤主恩未甘遲莫景伏櫪意
猶存

上烏林天使三首

平生隨牒浪推移只爲生民不爲私萬里翠輿猶
遠播一身幽囿敢終辭魯人除館西河外漢使驅
羊北海湄不是故人高誼切官來軍府問鍾儀
拭玉轅門吐寸誠敢將緩頰沮天兵雷霆儻官矜

彫弊草芥何須計死生定鼎未應周命改登壇合
許趙人平知君妙有經邦策存取威懷萬世名
當時初結兩朝歡曾見軍前捧血盤本爲萬年依
蔭厚那知一日遽盟寒羊牽已作俘囚獻魚漏終
期網罟寬幸有故人知底蘊下臣獲考敢謀安

姑蘇滕惇禮榜所居閣日齋心成都宇文某
作詩以廣其意

不是憑虛避世喧此中於物本無緣靜看畏影徒

勞爾題作齋心亦且然意識已隨言語斷生涯聊
任歲時遷老夫未涉天游趣三復南華第四篇

和高子文秋興二首

沙碧平猶漲霜紅粉已多駒年驚過隙鳧影倦隨
波散步雙扶老棲身一養和羞看使者節甘荷牧

人蓑

好問按養和几名事見江湖
散人集扶老見歸去來辭

搖落山城莫棲遲客館幽葵衰前日雨菊老異鄉
秋自信浮沈數仍懷顧望愁蜀江歸棹在浩蕩逐

春鷗

又和九日

老畏年光短愁隨秋色來一持旌節出五見菊花
開強忍玄猿淚聊浮綠蟻杯不堪南向望故國又
叢臺

中秋覓酒

今夜家家月臨筵照綺樓那知孤館客獨抱故鄉
愁感激時難遇謳吟意未休應分千斛酒來洗百

年憂

四序回文十二首

春

短草鋪茸綠殘梅照雪稀暖輕還錦褥寒峭怯羅
衣

翠漣冰綻日香徑晚多花細筍抽蒲密長條舞柳
斜

折花幽檻小傾酒綠杯深蝶舞輕風曉鶯啼老樹

陰

夏

翠密團窓竹青圓貼水荷睡多嫌晝永醒少得風

和

草徑迷深綠蓮池浴膩紅早蟬鳴樹曲鮮鯉躍潭

東

暴雨隨雲驟驚雷隱地平好風搖箬透輕汗挹水

清

秋

晚日欣簾捲涼風覺袂搖遠吟高興遣長醉宿愁

銷

短葦低殘雨虛舟帶晚潮斷鴻歸暗浦疎葉墮寒

梢

慙慙蜚吟苦茫茫水驛孤日銜山色莫霜帶菊叢

枯

冬

鶻健呼風急鳥啼促景殘窟深宜兔蟄蒲折蔭魚寒

裂瓦寒霜重鋪窓月影清滅燈驚好夢孤枕念深情

秀栢留陰綠芳梅蘸影斜溜簷冰結玉裝樹雪飛花

燈碑五首

清陰靄靄匝城闔萬井熙熙桃杏春紫陌傳呼旌

旆出重臣新佩玉騏驎

鈿軸天章拜異恩驂驪花騎暎朝暉手持禁鑰千

門肅官壓東宮二品尊

壘原清照白登山彌隴連天麥浪寒劍戟漸銷農器出人家只識勸農官

九夏南風入舜琴恩風澤雨浹飛沈陪京最是儀形地先識君王解愠心

枹鼓無聲獄訟空懽謠擊壤萬家同時人共解班

春意兵寢刑清第一功

館中書事

雨來蒸鬱似江鄉
雨過西風特地涼
尚有庭花供客恨
可無罇酒慰幽芳

時習齋

未厭平生習氣濃
更將餘事訓兒童
魯論二萬三十字
悟入從初一句中

醉經齋

傷人但笑腹便便
枕籍詩書正晝眠
不識先生真悟處
未離文字已逃禪

醉墨齋

旋汲清泉起縠紋
定知婁永是前身
箇中自可逃真性
不用淋漓汗葛巾

烏夜啼

汝琴莫作歸鳳鳴
汝曲莫裁白鶴怨
明珠破壁挂高城
上有烏啼人不見
堂中蠟炬紅生花
門前紺

金言卷四
一四
憶七香車博山夜長香燼冷悠悠蕩子留倡家妾
機尚餘數梭錦織恨傳情還未忍城烏爲我盡情
啼知道單棲淚盈枕

附大金國志宋遣使宇文虛中來祈請二
帝堅不許之虛中時安置韶州應詔願使
絕域遂詔赴行在復資政殿大學士爲祈
請使楊可嗣副之尋又遣劉誨王貺爲通
問使副明年春金人並遣歸虛中曰奉命

北來祈請二帝二帝未還虛中不可歸於
是獨留

附三朝北盟會編紹興元年十二月十四
日詔存恤宇文虛中子孫虛中建炎二年
爲祈請使使於金國不得如所請遂不肯
還朝獨令其副楊可輔歸上思虛中忠節
乃詔存恤其子孫虛中在北聞劉豫任用
張孝純常寄詞與孝純其絕句曰有人若

問南冠客爲道西山賦蕨薇

附宋名臣言行續錄公初使北爲所留後爲所用公知東北之士憤不爲北用密以信義感發之從者如響乃與其翰林學士高士談同謀欲因金主郊天就劫之先期以蠟書來告南朝欲爲之外應秦檜拒不納會事亦覺公與其子師瑗皆坐誅闔門無譙類留正日公之忠亦可考矣方建炎

之初以資政殿大學士奉命使金留繫金庭抗節不屈故相秦檜用事盡歸其咎於金則紹興十二年也公在金久其諸名王大族皆尊信之不疑因與其子師瑗暨翰林學士高士談謀舉事欲因九月金主祭天而劫之諸王宗親約爲內應不幸而功不成者天也

附金詩紀事叔通雲館之集旣見輕於朱

少章史又謂洪皓至上京見而甚鄙之皆以其受金官故也然觀仕金之後宋所以待舊臣者其禮有加繼因其受誅於金爲之贈官追謚賜廟置後優卹備至如北盟會編及名臣言行錄諸書皆稱其忠節如此蠶書之告郊天之約言之鑿鑿則似乎蓄意復讐如李少卿所云虛死不如立節滅名不如報德者事誠有之不盡出於羅

織鍛鍊而高子文之被殺亦非獨圖書之爲禍胎耶

吳學士激

二十五首

激字彥高宋宰臣拭之子王履道外孫而
米芾元章壻也工詩能文字畫得其婦翁
筆意將命帥府以知名留之仕爲翰林待
制出知深州到官三日而卒有東山集十
卷并樂府行於世東山其自號也出散關
詩云春風蜀棧青山盡曉日秦川綠樹平
愈甫索水墨以詩寄之云煙拂雲梢留淡

白雲蒸山腹出深青三衢夜泊云山侵平
野高低樹水接晴空上下星太清宮云玉
座煙霞春寂寂石壇星斗夜蒼蒼呈正甫
云手版西山聊復爾角巾東第定何時遊
南溪潭云竹院鳴鐘疑物外畫橋流水似
江南飛瀑巖云數樹殘花喜春在一聲啼
鳥覺山深詠鄭邸故伎云玉雪自知塵不
浣丹青難寫酒微醺送樂之侍郎云四海

蒼生謝安石一言宣室賈長沙送韓鳳閣
使高麗云海東絕域皇華使天上仙官碧
落卿偶題云江湖欹枕夢風雪打窓時此
類甚多樂府夜寒茅店不成眠南朝千古
傷心事誰挽銀河等篇自當爲國朝第一
手而世俗獨取春從天上來謂不用他韻
風流子取對屬之工豈真識之論哉

山中見桃花李花

錦里春風徧海棠別時無計奈紅芳山中桃李渾
疑晚猶有殘花斷客腸

長安懷古

佳氣猶能想鬱葱雲間雙闕峙蒼龍春風十里灞
陵樹曉月一聲長樂鐘小苑花開紅漠漠曲江波
漲碧溶溶眼前疊嶂青如畫藉問南山共幾峰

宿湖城簿廳

日遲風暖燕飛飛古柳高槐面翠微卷上疎簾無

一事滿池春水照薔薇

窮巷

窮巷無來轍貧家有舊醅窓明憐雪在睡美覺春
回菜甲方齊拆梅花亦半開茅簷鳴好鳥節物莫
相催

偶成二首

一番瘦筍羽林槍松架陰陰盡日涼繞屋雲烟無
定態連山草木有真香

蟹湯兔盞鬪旗槍風雨山中枕簟涼學道窮年何
所得只工埽地與焚香

病後寄開甫

暗蛩咽幽響隙月漏微光溪上風雨過翛然有餘
涼病瘦鶴骨立低垂不能翔懷我中山兄開經焚
道香猿嘯耿清夜鐘鳴悠夕陽商秋早晚至夢寐
松楸蒼

過南湖偶成

杏山松檜紫坡陔湖面無風亦自波綠鬢朱顏嗟
老矣落花啼鳥奈春何詩人未必皆憔悴世事從
來有折磨列坐流觴能幾日誰知對酒愛新鶯

夜汎渦河龍潭

輕舟弄素月靜夜橫清渦天風毛髮亂疎星燦明
河圖經記父老冥冥年歲多淵沈三千丈湛碧寒
無波微流帶文藻絕岸無柔莎炯如帝鴻鏡可鑒
不可磨中蟠至神物役使羣蛟鼉蜿蜿頭角古勁

鬢誰敢劇深宮照珠貝頗費蚌與螺何時葛陂竹
化作陶公梭

秋興

後園雜樹入雲高萬里長風夜怒號憶向錢塘江
上寺松窓竹閣瞰秋濤

晚春言懷寄燕中知舊

閒雲洩洩日暉暉林斧谿春響翠微天氣乍晴花
滿樹人家久住燕雙飛鄰村社後容賒酒客舍新

來未綻衣遙憶東郊亭畔柳歸時相見亦依依

歲莫江南四憶

瘦梅如玉人一笑江南春照水影如許怕寒粧未
勻花中有仙骨物外見天真驛使無消息憶君清
淚頻

天南家萬里江上橘千頭夢遶閭門迥霜飛震澤
秋秋深宜映屋香遠解隨舟懷袖何時獻庭闈底
處愁

吳淞潮水平月上小舟橫旋斫四腮鱠未輸千里
羹擣藿香不厭照箸雪無聲幾見秋風起空悲白
髮生

平生把螯手遮日負垂竿浩渺渚田熟青熒漁火
寒憶看霜菊艷不放酒杯乾此老垂涎處糟臍箇
箇團

述懷

旅食空彈鋏歸休合挂冠烟塵榆塞遠風雨麥秋

寒巢燕長如客鳴蛙不屬官柴門江漲到落日下
漁竿

喜晴和張魯瞻

原野悅新沐豐隆寧世情鳥歸林靄暝樓射澗虹
明春草牛羊遠人家機杼鳴慘舒長有命誰復問
陰晴

國公女生日席上命賦

雪射瑤堦月春回玉女扉雲中三秀草石上六銖

衣酒熟鵝兒色身輕燕子飛客槎還汎斗誰解卜
楮機

秋夜

豈有涓埃補聖明強扶衰病厠豪英夜窓燈火青
相對曉鏡髭鬚白幾莖年去年來還似夢江南江
北若爲情石田茅舍君家近藉與林泉送此生

招趙資深拾遺

別久貌逾壯道同心更親移居近韋杜相對邈參

辰雪少似饒客鳥喧知得春歸期淹幾日莫厭馬
蹄頻

同兒曹賦蘆花

天接蒼蒼渚江涵裊裊花秋聲風似雨夜色月如
沙澤國幾千里漁村三兩家翻思杏園路鞭裊帽
簷斜

張戡北騎

張生鞍馬客幽都却笑靈光筆法麤祗今白首風

沙裏憶向江南見畫圖

早春

寂寂重寂寂出門春草齊
晚芳猶著樹江漲欲平
溪山暝有時雨村深何處雞
遠山緣底恨故作傍
人低

雞林書事

箕子朝鮮僻蓬丘弱水寬
儒風通百粵舊史記三
韓邑聚居巢慣夷裝被髮安
猶存古籩豆兼用漢

衣冠兔穎家工縛鮭腥俗嗜餐騎兵腰玉具府衛
挾金丸長袖鳶窺肉都塲狔掛竿琴中蔡氏弄指
下祝家彈主禮分庭抗賓筵百拜難漬橙杭釀旨
滋桂鹿脩乾潑墨松如櫛墮墜石似丹地偏先日
出天迫衆山攢鵬翼雲帆遠羊腸石磴盤由來異
文軌休訝變暄寒事可資談柄誰能記筆端聊將
詩貌取歸作畫圖看

題宗之家初序瀟湘圖

江南春水碧於酒客子往來船是家忽見畫圖疑
是夢而今鞍馬老風沙

